



Müstair, 06.03.2025 GBB/nm

Missiva da la suprastanza

per la radunanza cumünala dals 26 marz 2025

Credit da fr. 6.9 miu. per la sanaziun da la chasa da scoula a Müstair

Stimadas votantas
Stimats votants

Pervi dal chal dal nomer da scolaras e scolars ha la suprastanza decis dal 2019 da surdar l'elavuraziun d'ün stüdi per examinar ils lös da scoula in Val Müstair. La lavur es gnüda surdatta al «Atelier für Lernraumplanung» da Burgdorf, ün büro perit, chi ha fingià elavurà per divers cumüns concepts per scoulas.

Als 19 favrer 2020 ha gnü lö üna dieta d'infuormaziun, ingiò cha las organisaziuns involucadas (suprastanza cumünala, cussagl da scoula, magistraglia e direcziun da scoula) sun gnüdas infuormadas da prüm man sur dals resultats dal stüdi. Implü es gnü preschantà quel di ün scenari pels prossems pass.

Il stüdi muossa cha la Val Müstair posseda fich buns lös per la scolaziun e chi da diversas pussibilitats per pudair schoglier las sfidas dal avegnir. Il stüdi muossa tanter oter ils avantags e'ls dischavantags dals lös da scoula / scoulina a Müstair – Sta. Maria – Valchava.

Dal 2021 ha la suprastanza surdat al «Atelier für Lernraumplanung» l'incumbenza per ün seguond stüdi dal spazi da las localitats, per metter tuot ils trais ciclus suot ün tet, sco pretais dal plan d'instrucziun 21. Quel stüdi es gnü preschantà als 9 schner 2023 a la gruppa da lavur ed als 30 da schner 2023 al cussagl da scoula. Tuots duos gremis han sustgnü quist'idea, chi ha pudü persvader in tuot ils puncts, ed han exprimi in quel sen lur giavüsch da cuntinuar il proget, cun Müstair sco lö da scoula per la Val Müstair.

Il proget «structuras da scoula Val Müstair» es in seguit gnü preschantà als 07.02.2023 in detagl a la suprastanza cumünala.

Unanim ha la suprastanza dat quella saira l'acconsentimaint e'l sustegn per elavurar inavant il proget, cun Müstair sco nouv lö da scoula per la Val Müstair.

L'andamaint es gnü francà seguaintamaing:

- Surdar al «Atelier für Lernraumplanung» la lezcha d'elavurar üna proposta plü detagliada dal spazi da scoula a Müstair.
- Infuormaziun a la magistraglia davart il stadi actual.

- Inscunters cullas gruppas chi han ün interess direct (Musica Concordia, grupp da teater da Müstair eui.)
- Comunicaziun a las medias.
- Sairada d'infuormaziun publica.

Sairada d'infuormaziun publica dals 24 mai 2023:

Quella ha gnü lö a chaschun da la radunanza cumünala dals 24.05.2023. Il protocol correspondent po gnir examinà sün la pagina d'internet dal cumün, www.cdvm.ch – portal da novitats – protocols.

Text da tractanda:

- Infuormaziun sur dal proget «scoula Val Müstair 2030» cun ün lö da scoula:
 - Introducziun
 - Motivs per ün lö da scoula
 - Program da las localitats
 - Che capita cul abitacul chi vain vöd?
 - Discussiun

In seis plets introductivs ha la presidenta cumünala Gabriella Binkert Becchetti dat ün'infuormaziun generala sur da quai chi'd es capità fin hoz ed ha confermà cha per la suprastanza ha l'interess da pudair spordscher eir in avegnir üna scoula attractiva, chi correspuonda a las pretaisas dal di d'hoz ed al plan d'instrucziun 21, prüma priorità.

Motivs per ün lö da scoula:

- Introducziun dal plan d'instrucziun 21, chi pretenda cha tuot ils trais ciclus vegnan instruits suot ün tet.
- Scoula moderna, cun pussibilitats per las structuradas da la maisa dal mezdi (Mittagstisch).
- Instrucziun in trais abitaculs impuonda considerabels cuosts per la gestiun e las investiziuns chi ston gnir fattas vi dals abitaculs e l'infrastructura, vouldir la chasa da scoula a Müstair e quella a Sta. Maria.
- Cuosts pels transports pon gnir diminuits cun quai cha'ls uraris da scoula gnaran adattats al cuors dal trafic public.
- Chal dal numer dals scolars.
- Sinergias chi pon gnir trattas a nüz cun ün lö da scoula, impustüt per la magistraglia chi po uschè coordinar plü bain ils plans d'instrucziun.

Avantags per Müstair:

- Lö ourasom la Val, fracziun la plü gronda (simplificaziun dals transports).
- Spazi ed architectura es avantman per partir la scoula i'ls differents ciclus.
- Grond spazi intuorn l'abitacul.
- Piazza da glatsch.
- Piazza da ballapè e da gimnastica.
- Piazza da tennis.
- Sala da gimnastica chi'd es plü gronda.
- Piazza da ballapè e piazza da giovar in Plazzöl, vouldir in vicinanza.

Avantags per Sta. Maria:

- Lö plü central.
- Locals d'instrucziun da cuschnar e da lavur manuala.

Quist es il facit dals motivs chi favuriseschan il lö da scoula a Müstair.

In ün'animada discussiun han ils respunsabels pudü dar respostas fundadas e cumpetentas sün las diversas dumondas da las votantas e'ls votants. La proposta da translocar il lö da scoula per tuot ils trais ciclus illa chasa da scoula a Müstair es crodà sün incletta ed accordanza.

Infuormaziuns davart da la part tecnica

La descripziun da la construcziun, plans dal proget, visualisaziun, cuosts da construcziun e plan da termins es agiunt a quista missiva.

Stimadas votantas

Stimats votants

La suprastanza ha trattà la dumonda dal credit da fr. 6.9 miu. per la sanaziun da la chasa da scoula a Müstair illa sezzüda dals 04.03.2025. Cun unanimità ha ella acconsenti il credit.

Ella conferma chi's tratta d'ün'investiziun a lunga vista, chi spordscha üna bun'infrastructura pels uffants e per la magistraglia. Ils cuosts pon gnir redots cul adattamaint previs da l'instrucziun als uraris dal trafic public. Ultra da quai po gnir sanada la substanza dal abitacul, chi es gnüda i'ls ons e chi pretenda lavurs dal mantegnimaint.

Tant la suprastanza sco eir il cussagl da scoula, la guida da scoula e' l'uffizi da scolaziun dal Chantun Grischun sun gnüts a la conclusiun cha' l'proget po gnir preschantà a las votantas e'ls votants sco ün'investiziun a bö'n da noss uffants ed uschè eir da la Val Müstair.

Our da tuot quists motivs propuona la suprastanza d'acconsentir, cun ün **schì**, il credit da fr. 6.9 miu. per la sanaziun da a chasa da scoula a Müstair.

Grazia fich per Lur sustegn.

Per la suprastanza dal
Cumün da Val Müstair



.....
Gabriella Binkert Becchetti, presidenta

